

Kerja dalamkan muara tidak diabaikan kerajaan

Jertih: "Itu hanya provokasi pembangkang. Hakikatnya, kerja mendalamkan muara dijalankan secara berterusan dan tidak diabaikan kerajaan seperti didakwa pembangkang," kata calon Barisan Nasional (BN), Tengku Zaihan Che Ku Abd Rahman.

Tengku Zaihan, lulusan Kejuruteraan Awam dari Universiti Sains Malaysia (USM) dan banyak memainkan peranan membantu masyarakat Kuala Besut ketika berkhidmat sebagai Jurutera Daerah Jabatan Pengairan dan Saliran (JPS) Besut, berkata kerajaan sudah mengambil langkah jangka pendek untuk mengatasi masalah muara cetek yang menyukarkan nelayan dan pengusaha bot.

Sudah buat kajian

Katanya, kerajaan juga sudah membuat kajian mengenai masalah itu dan ia perlu dilakukan secara terperinci bagi memastikan tindakan diambil kelak tidak akan menimbulkan sebarang masalah pada kemudian hari.

Beliau berkata, kerajaan melalui JPS dan beberapa agensi lain sudah menjalankan pelan tindakan untuk menangani masalah itu dengan setiap tahun, kerja mendalamkan muara Sungai Besut dijalankan bagi memudahkan laluan bot nelayan dan pengusaha bot untuk keluar masuk.